

朝妃嬪例贈謚曰仁淑宮曰孝徽園曰仁明設三都監李徽之製表黃景源製誌狀宋德相製誌銘蔡濟恭製哀冊徐命善製謚冊時洪國榮橫恣日甚舉朝莫敢拂意洪氏殯葬之節禮官悉援僭例宋德相至以為當有公除寢不行○辛卯○壬辰○癸巳○甲午○乙未  
有氣如火光○丙申○丁酉命每年五月十三日至二十二日停視事二十二日即莊獻世子諱辰也上每遇是月齋居孺慕不御萬機至是始命政院著為式○戊戌○己亥特擢洪樂春為知中樞府事○庚子○辛丑○壬寅○癸卯○甲辰○乙巳○丙午以李重祐為判義禁府事俞彥鎬為同知經筵事○丁未都承旨洪國榮上疏曰臣福薄而位驟門寒而地隆人猜鬼忌之禍畢竟不于臣而丁于我仁淑元嬪聖懷震悼深以國家大計為茫然如臣父母之些少情境不敢仰煩上聽以惹聖懷而臣之慘酷冤呼之私實非人所堪在臣情理固當即日納符扶將病親以卒日短之願而嗚呼今以後聖上之昔之孤危者愈復孤危宿衛一步即臣生死之所豈敢以私商量計較於其間哉然臣之銀臺長席今已四春秋矣院之古事每日首書都承旨臣某坐其寂多日月者不過十許朔則臣之匪據不問一人不漏一日直書臣姓名者凡幾日月矣臣於此變之前猶未嘗不背汗而